

Oqaasiliortut Ataatsimiinnissaat
Ataasinngorneq juunip 9-anni 2008 nal. 10.00
Ilimmarfimmi Oqaasileriffiup ataatsimiittarfiani.

Peqataasussat: Eva Møller Thomassen, Abia Abelsen, Stephen Heilmann
aamma Carl Chr. Olsen
Allatsi: Katti Frederiksen
Ellen J.Karlsen peqataasinnaanani nalunaarpoq.

Oqaluuserisassatut siunnersuutit:

1. Tikilluaqqusineq
2. Kingullermik ataatsimiinnermit imaqarniliap akuerineqarnera
3. Saaffiginnissutit suliaartallit:
 - a. opholdskommune
 - c. European Food Safety Authority - Europami Nerisaqarnikkut
Isumannaatsuunissamik Aalajangiisartut
 - c. fortolke aamma forklare
 - d. coach
 - e. molekylar der bærer arveegenskaber i levende celler
- 4. Sprogpolitik** (sprogpolitikissamut suut ilanngunneqassappat?)
5. Allat

Inussiarnersumik inuulluaqqusilluta

Carl Chr. Olsen


Siulittaasoq

Katti Frederiksen

Allatsi

- 1.aamma 2.pillugit -

Oqaasiliortut siulittaasuat tikilluaqqusivoq.



Kingullermik ataatsimiinnermit imaqarniliaq immikkut
allanguutissartaqartinneqanngimmat akuerineqarpoq.

- 3. pillugit -

a. opholdskommune - **kommune najugarigallagaq**, tassani erseqqissarneqarpoq
kommunip ataavartumik najugarineqannginnera, taamaallaalli
utaqqiisaagallartumik imaluunniit

b. European Food Safety Authority - **Europami Nerisaqarnikkut**

Isumannaatsuunissamik Aalajangiisartut

c. fortolke tassaavoq **isumasiuineq**, aamma forklare tassaalluni **nassuiaaneq**.

d. coach kalaallisut taaguuserneqarpoq **[Ingerlaqqinnissamik] Iltersuisoq**
coaching - **[Ingerlaqqinnissamik] Iltersuineq**

e. DNA: molekylar der bærer arveegenskaber i levende celler kalaallisut
nutsernissaanut nalornilluni saaffiginnissuteqarsimasup nalorninera

Oqaasiliortunit akissuteqarfigineqassaaq DNA kalaallisut DNA-mik aamma
taaneqaannartassasoq, nassuiaataali imaassasoq: molekylit kingornuttakkanik
attassisut.


- 4. pillugu -

Sprogpolitikip allanneqarnissaanut Oqaasiliortut pingaarutilinnik

ilanngussassanik isumasiorneqarput. Siullermik siornatigut oqaatsinut

politikissamik suliaqarnissamut siunertaasimasut, soorlu ...*oqaaserli* 2001-mi

saqqummersoq, kiisalu Oqaatsitigut Akuunerulernissamik suliaqarsimasut




saqqummiussimasaat uteqqiivigillatsiarneqarput. Pingaartinneqarpoq, soorluttaaqa aamma Oqaatsitigut akuunerulersitsinissamik suliaqartut nalunaarusiaanni allaqqasoq, meeraaqqerivinniit ilinniarfeqarfiit ingerlaqqiffiusut tikillugit ataqatigiissumik oqaatsinut politikeqartinneqarlutik malitassaqaqtinnissaat suliniutigineqassasoq, taamaalilluni meeraaqqerivinniit atualernermi, kiisalu meeqqat atuarfiiniit ilinniarnertuunngorniarfinnut ingerlaqqinnermi oqaatsitigut piginnaasat aporfianatik ingerlaqqittoqartarnissaa anguneqarsinnaassammat.

Oqaatsitigut politikip sapinngisamik inuiaqatigiinni kalaallisut, qallunaatut allamiullu oqaasiinik atuisut peqataatittussaassavai, allamiutut oqaasillit avataaniittutut misigitinnagit, taamaattorli Namminersorneq pillugu isumalioqatigiissitami siunertarineqartoq kalaallit oqaasiisa pisortatigoortumik oqaasiunissaat taassumalu atortinneqarnissaa tunngavigalugu inatsisiliortoqassasoq ersarissarneqarluni.

Ukiorpassuarni qallunaat oqaasiisa kalaallinut qallunaatut oqaasilittut isigineqarlutik ilinniartitsissutigineqartarnera allanngortinneqartariaqarpoq, tassa qallunaat oqaasii tapertaralugit oqaatsitut isigalugit nunatsinni ilinniartitsissutigineqartarnissaa pisariaqartutut nalilerneqarmat.

Taassumalu soorunami malitsigissavai aningaasartuutaasussat assigiinngitsut: atortussallu, ilinniutit aammalu oqaatsinik ilinniartitsisut immikkut




tapertaralugu oqaatsinik ilinniartitsinissamik ilinniarsimasut. Tassani meeqqat atuarfii, ilinniarnertuunngorniarfiilu pineqarput, taamaattumik taakkunani ilinniartitsisuulersussat aaqqissuussaasumik oqaatsinik ilinniartitsisutut ilinniartitsisunngorniarinnaanissaat anguniarneqartariaqarluni.

Ilinniartitsisut nunanit allaniit tikittut atorfininnermi aalajangersimasunik nunatsinnullu pissutsinut qanilaartumik ilinniartitsinissaannut malitassaliuunneqarnissaat pisariaqarmat ilinniarnertuunngorniarfiit aaqqissugaanerisa nutarteqqinneqarneranni ilanngunneqarsinnaasutut takorloorneqarsinnaavoq.

Kalaallit oqaasii Nordisk sprogdeklarationimi tamakkiisumik inuiaqatigiinni atugaasutut (samfundsberenditut) taaneqarput naalagaaffimmi oqaatsit atugaasuunatik (statsberendiunatik), tamannalu peqquteqarpoq Kalaallit Nunaat Danmarkilu naalagaaffeqatigiinnerannik minnerunngitsumillu suli kalaallisut oqaasiisa immikkut isigineqarlutik ineriartorteqqinneqarnissaat aningaasatigullu tapersorneqarnissaat suli pisariaqarluarmat.

Kalaallisut allattaaseqarnitta malittarisassaqaqarnittalu tamanut atuutsinneqarnissaa pillugu oqaatsitigut inatsimmi ilanngussaqaqartoqarnissaa ilanngullugu eqqartorneqarpoq, tassani eqqarsaatigineqarpoq allagartalersuisarnerit aamma paasissutissiisarnerit inuit tamat ornittagaanni Namminersornerullutik Oqartussat pigisaanni. ...Oqaaserli 2001-mi saqqummermat paasissutissiineq pillugu ima allassimasoqarpoq



‘Saaffiginnissutit allagartalersuinerillu inuiaqatigiinnut tamanut tunngatitat kalaallisut qallunaatullu allassimasarnissaat.’ (...Oqaaserli, 2001:13).

Ataatsimiinneq naggaserlugu oqaatsit pillugit saqqumilaarniarnissamut atasumik Oqaasiliortut siunnersuuteqarput Nunat Aqqinik Aalajangiisartut, Inuit Aqqinik Akuersisartut peqatigalugit Naalakkersuisut kulturimut ataatsimiititaliaata ukiamut ataatsimiinnissaa iluatsillugu qaaqquisinnaassallutik, tamannalu periarfissaq atorluarlugu sulianik pilersaarutininik kiisalu anguniakkanik saqqummiisoqarsinnaassalluni.

- 5. pillugu -

Saaffiginnissutaasimasut allat oqaatsip sanarfivaap ullumikkut atorpeqartarnera aammalu oqaaseq atorpaa radiukkut nipilersortunik appissinialernermi atorpeqartarnera ippigalugu saaffiginnissut Oqaasiliortuniit ima akissuteqarfigineqarpoq:

‘Oqaasiliortut isumaqatigiipput oqaaseq sanarfivaa piniarnermi taaguutiniit ukiut ingerlanerini pissutsillu allanngoriartorneri ilutigalugit atorpeqartarfia allanngoriartorluni ineriartorsimasoq, tassa inuiaqatigiit atugaannut tulluussarluni. Oqaatsit oqariartaatsinut allanut atuuffeqalernerata ersersiinnarpaa kalaallisut oqaatsitta qanoq eqaatsiginerat, taamaattumillu ullumikkut atorpeqalersimanerasut Oqaasiliortuniit akuerisaalluni.

Oqaatsip aappaa ippigisarnerarlugu saaffiginnikkavit ilaatigut immaqa isumaqatiginarsinnaavoq oqaluutip qanoq ilusilerlugu atorpeqarnera eqqarsaatigissagaanni, tunngaviatigulli oqaatsip naggiata atorpaa-p oqaatigineqartarnera kukkunerunngitsutut nalilerneqarpoq, tassinissaarmi qulaani akissutaareersup assigeqqinnaarmagu, tassa oqaatsit ineriartornerisa oqaatsinik ‘atoqqiisarnerit’ kalaallit oqaatsitsinni takornartarinngisatta ilagiinnarmagu.’

Inussiarnersumik inuulluaqqusilluta

Carl Chr. Olsen

Siulittaasoq

Katti Frederiksen

Allatsi